

REGOLAMENT PE CONCESSION DI CONTRIBÛTS PAR ATIVITÂTS A TUTELE E PROMOZION DE LENGHE E DE CULTURE FURLANIS.

Art. 1

Cjamp di aplicazion

1. Chest Regolament, daûr dal articul 19 de leç regionâl dai 22 di Març dal an 1996, n. 15 e dal art. 26 de leç regionâl dai 27 di Novembar dal an 2006, n. 24, al dissipline cun ce criteris e cun ce proceduris che si pues concedi contribûts a sosten des ativitâts di conservazion, di difusion e di valorizazion de lenghe e de culture furlanis.

Art. 2

Sogjets beneficiaris

1. A puedin beneficiâ dai contribûts chescj sogjets: i ents locâi, lis scuelis, lis associazions culturâls che no lavorin pai bêçs e che a àn la lôr sede legâl o pûr che a davuelzin la lôr ativitât tai comuns de Provincie di Pordenon, notâts te liste dai D.P.G.R. dai 15 di Novembar dal an 1996, n. 0412/Pres. e dai 20 di Mai dal an 1999, n. 0161/Pres. come teritori regionâl dulà che la lenghe furlane e ven fevelade par tradizion di un biel numar di personis.

Art. 3

Intervents ametûts a contribût

1. A son di podê finanziâ, su la fonde di direzions precisis di programazion ative, lis ativitâts ta chescj setôrs:

a) studis e ricercjis:

indagjins su la condizion lenghistiche de lenghe furlane ator pal teritori regionâl, ricercje, ricuelte, catalogazion e ordenament di testimoniancis e di materiâi storics, archivistics, etnologjics, folcloristics, ricuelte e compilazion di repertoris lenghistics furlans, redazion e publicazion di atlants, cjartis e di altris documents des zonis storichis, culturâls e lenghisticis; organizazion di seminaris, cunvignis e incuintris scientifics e culturâi; ativitât di ricercje, sperimentazion e documentazion su problemis che a rivuardin la storie, la economie, la societât, lis tradizions e il patrimoni culturâl, artistic e lenghistic furlan, concession di borsis di studi o di ricercje; ativazion di cors universitaris di insegnament;

b) stampe, editorie, produzioni audiovisivis e mieçs di comunicazion sociâl:

stampe di gjornâi e di periodics par furlan, cun chê di svilupâ e di difondi la cognossince de storie, de lenghe, de culture e des tradizions furlanis; publicazions di oparis scientifichis e di divulgazion che a rivuardin la culture e la lenghe furlanis, ativitâts informativis e promoziônâls pai mieçs di comunicazion sociâl; realizazion di programs radiotelevisîfs, produzion di oparis e di iniziativis cinematografichis e audiovisivis par furlan o che àn a ce fâ cu la storie e cu la culture furlanis;

c) scuele:

cors di informazion e di inzornament, studis e ricercjis pe scuele o pûr tes comunitâts di emigrâts, su la realtât storiche, culturâl, lenghistiche e su lis tradizions furlanis, ancje mediant di sussidis didatics,

concors tra i students e altris ativitâts parascolastichis par cognossi la storie, la culture, la lenghe e lis tradizions furlanis;

d) spetacul:

ricuelte e traduzion di tescj teatrâi par furlan, compilazion e publicazion di monografiis, cercjis, cuaders e dispensis su lis espressions teatrâls par furlan e su la storie di chestis espressions; ricercje, regjstrazion e publicazion dai tescj musicâi popolârs; alestiment e organizazion di recitazions, di spetacui e di concerti di companiis teatrâls, di grups folcloristics, di complès corâi che a lavorin par e par puartâ ator e par fâ cognossi cognossi il patrimoni teatrâl e musicâl furlan;

e) toponomastiche:

ricuelte e studi dai toponims furlans e publicazions sientifichis a rivuart, ancje cul fin di tornâ a meti in vore indicazions cu la toponomastiche origjinarie.

2. La semplice presentazion de domande no da dirit a vê i contribûts, ancje se a son ducj i requisîts sogjetîfs e ogjetîfs che a son di vê.

Art. 4

Direzions e criteris

1. Te assegnazion i contribûts si ten cont di chescj criteris e di chestis direzions:

a) se il progjet al è di interès provinciâl o di plui comuns e de sô difusion sul teritori ai fins de valorizazion de lenghe furlane;

b) se ents, associazions e istituzions a colaborin tal davuelzi la ativitât;

c) se al è un valôr economic te produzion culturâl e se e je continuitât te realizazion de iniziative;

d) se e trop che e ven doprade la lenghe furlane tal complès dal progjet;

e) se i tescj a vegnin produsûts in lenghe standard e te grafie uficiâl de lenghe furlane.

2. Si pues contribuî cun almancul 2.000,00 euros pai ents locâi e pes associazions culturâls che no lavorin pal bêç, e cun almancul 1.000,00 euros pes scuelis.

Art. 5

Tiermins e mûts di presentazion des domandis

1. Lis domandis a van fatis su cjarte legâl e sotsegnade dal rapresentant legâl dal ent. A àn di rivâ dentri dai 31 di Zenâr di ogni an a la Aministrazion provinciâl di Pordenon e a scuegnin vê dentri chescj documents:

a) relazion in detai de iniziative di davuelzi pal an in cors e di ameti al contribût;

b) bilanç preventîf relatîf a la iniziative che si fevele tal pont a);

c) relazion in struc de ativitât davuelte tal esercizi prin di chel di riferiment;

d) cont consuntîf totâl relatîf al esercizi prin di chel di riferiment;

e) copiis dal at constitutîf e dal Statût (se no son za tes mans de Aministrazion provinciâl) pai sogjets privâts;

f) composizion dai orghins sociâi (inzornâts ae date de domande) pai sogjets privâts;

g) at formâl e esecutîf dal orghin deliberant che al permet ai ents publics di fâ domande.

2. Cuant che lis domandis a vegnin mandadis par raccomandade, il timbri de pueste al garantîs il rispjet dai tiermins, a pat che la raccomandade e rivi dentri di cuindis dîs dopo de date de scjadince dal tiermin. Pes letaris che a rivin a man o cul corîr, il rispjet de date di scjadince lu prove il timbri di acet dal protocol de Aministrazion provinciâl.

3. Lis domandis che a rivin plui in là dal tiermin fissât tal come 1 no vegnin tignudis in considerazion.
4. Se la documentazion no ves di jessi complete, si indi domandarà integrazion te comunicazion di inviamet dal procediment aministratîf. Il tiermin dal procediment al reste sospindût fin che no ven presentade la integrazion domandade. Se no ves i rivâ dentri di 30 dîs dal riceviment de domande, il procediment nol larà a bon fin.

Art. 6

Assegnazion e erogazion dal contribût

1. A la fin de istrutorie il sogjet che al à fate domande al ricêf l'esit. Se il contribût i ven assegnât, i ven domandade te assegnazion une declarazion di acet dal contribût, e un preventîf particolâr di spese par doprâ il contribût, che al à di jessi de stesse some dal impuart assegnât. La comunicazion e fisse ancje il tiermin pe rispueste.
2. Come che nus rivin la declarazion di acet e il preventîf particolâr di spese, o proviodarìn a concedi il contribût assegnât.
3. I contribûts a vegnin erogâts tune uniche soluzion cu la emission dal proviodiment di concession.

Art. 7

Rindicontazion dal contribût

1. I beneficiaris dal contribût che a son par nature juridiche associazions cence vuadagn, a àn di presentâ, dentri dai 31 di Zenâr dal an cu ven, la liste analitiche de documentazion a justifiche des spesis sostignudis, butade jù daûr di ce che al dispon l'art. 43 de leç regionâl n. 7/2000.
2. Se il beneficiari al è un sogjet public (Ents locâi o Scuelis) al à di presentâ, dentri dai 31 di Zenâr dal an cu ven, une declarazion firmade dal rapresentant legâl dal ent o dal funzionari responsabil dal procediment, che al prove che la ativitât ogjet dal contribût si è davuelte tal rispjet des disposizions normativis che a disciplinin la materie e tal rispjet des condizions che a vessin di jessi stadis fissadis tal at di concession, daûr dal art. 42 de leç regionâl n. 7/2000.
3. I beneficiaris dal contribût a varan di presentâ, insiemit cu la rindicontazion economiche, i materiâi promoziônai produsûts pes iniziativis davueltis. Cheste documentazion e varà di ripuartâ la scrite "realizât cul contribût/jutori de Provincie di Pordenon".

Art. 8

Tai dal contribût

1. Se la rindicontazion no ves di rivâ dentri dal tiermin fissât, il contribût al vignarà taiât in automatic e il beneficiari al sarà obleât a tornâlu a la Provincie. Cundiplui, il beneficiari al restarà fûr di dutis chês altris sovvenzions tal prossim esercizi.
2. Se, finît il procediment, e ven ordenade une ispezion de documentazion presentade di rindicont e si cjate che il contribût nol è stât doprât par ce che e dispon la leç in vore in materie o che la iniziative no je lade indenant, la concession e ven gjavade.

Art. 9
Jentrade in vore

1. Chest regolament al va in vore a partî de date di esecutivît de deliberazion di aprovazion fate dal Consei.
2. Par ce che nol è proviodût clâr di chest Regolament, a valin lis disposizions di leç in vore in materie.